

Friday, January 9, 2026

Time - 2:30pm - 2:35pm

AKASHVANI AIZAWL
REGIONAL NEWS BULLETIN
(MIDDAY)



HEALTH MINISTER PRESS MEET

Health Minister Pi Lalrinpuii'n HIV/AIDS do kawngah Mizoram sorkar chuan theihtawp a chhuah reng tih a sawi.

Pi Lalrinpuii hian vawiin khan a Pisa, MINECO-ah Chanchinbu mite a kawm a, National AIDS Control Organization (NACO) in kum 2025-2026 chhunga India ram State leh UT hrang hranga State AIDS Control Society te hnathawh that dan a tehnaah Mizoram State AIDS Control Society (MSACS) chu pathumna a ni tih sawiin, hei hian AIDS dona kawngah sorkar chuan theihtawp a chhuah a ni, tih a entir tih a sawi.

Minister chuan, Mizoram sorkar chuan theihtawp chhuah mah se natna an do chu mimal nun khawih, mimal duhthlanna leh chhungkaw inrelbawlna nena kalkawp a nih tlat avangin an duhthusam ang result neih a harsat thu a sawi a, sorkar hmalakna a hlawhtlin leh zual theih nan mipui te chu a tam thei ang berin thisen test se a duh thu a sawi bawk.

Sorkar tangka kum kal laiah kawng hrang hranga hmalak a nih thu sawiin Minister chuan, MLA zawng zawng ten HIV/AIDS do nan an MLA Fund atangin Rs 50,000/- theuh an thawhkhawm tih a sawi a, heng sum te hi hmun kilkhawr zawka khawsa, dinhmun harsa bawk si, HIV hrikpai ten damdawi an lak theih nan leh an inekawlina senso atan hman a nih thu a sawi bawk.



HIV/AIDS

Mizoramah kum 2024 April atanga kum 2025 November thla chhungin HIV kai thar mi 3257 hmuh chhuah an ni.

Health Minister Pi Lalrinpuii'n vawiin khan a Pisa, MINECO-ah Chanchinbu mite a kawmna-a a sawi danin kum 2024 April atanga kum 2025 November thla chhungin Mizoramah thisen endik 145,525 an awm tawh a, HIV hrik pai hmuh chhuah zingah Mipa mi 2125 an ni a, hei hi za zela 65.2% a tling a, hmeichhia mi 953 niin heng bakah hian naupai bik mi 179 an a bawk.

Pi Lalrinpuii chuan, Mizoramah HIV test-na hmun ICTC chu hmun 43 a awm tih sawiin, sex atanga inkaichhawn theihna natna neite enfahna leh enkawlina

- Designated Sexually Transmitted Infection & Reproductive Track Infection Clinic (DSRC Clinic) chu hmun 10 a awm tih a sawi bawk.

Minister chuan HIV hrikpaite enkawlna (ART Centre) hmun 14 a awm mek tih sawiin, hengah hian HIV hrikpai mi 18,355 enkawl mek an ni a ti a. HIV hrikpai ART enkawlna la mek te zinga 97.7% te chuan Viral Suppression an nei mek a, kum 2024 April atanga nikum October inkara nu naupai HIV positive hmuchhuah ART a ziah luh zawng zawng ten ART tha takin an la mek bawk a ni tih a sawi bawk a ni.



AIZAWL FOREST DIVISION

Aizawl Forest Division hnuaiia Seling leh Saitual Range tang kawpte chuan an report dawn bawhzuiin, Saza sa leh a peltu an man.

Sa peltua puh hi Sesawng khaw mi niin, Forest Department hian an thudawn bawhzuiin nimin piah khan a in leh a chhehvel an dap a, Saza sa leh pawihkhawihna atana a hman hmanrua te an man a. nimin khan thubuui siamsak niin, Central Jail-ah dahluh nghal a ni. Sa peltu nia puh man tak hian phalna tel lova Saza a lo pelh avang leh a sa te phalna tel lova a lo kawl avang hian The Wildlife (Protection) Act a bawhchhia a; Saza hi The Wildlife (Protection) Act, 1972 hnuaiia Schedule 1 ramsa zinga mi a nih avangin Section 51 behchhanin hremna na tak – lung in kum 3 aia tlem lo, kum 7 thleng tan theihna leh pawisa fai cheng ₹25,000/- thleng chawi theihna a ni.

Forest Department chuan Mizoram State Animal Saza chu humhalh tura tan lak a nih mek laia pawikhawihna a thleng chu pawian tih thu an sawi a, Zoram mipuite nungcha leh ramngaw humhalh kawnga hma sawn zel turin an ngen a ni.



LADC

Lai Autonomous District Council ah hun rei tak chung sawrkar mumal a din theihloh hnuah vawiin khan MNF leh Congress Party in United Legislature Party dinin Larsap hnenah sawrkarna an siam theih thu an thlen.

Member 8 nei MNF leh Member 7 nei Congress ten an din United Legislature Party ah hian an hruaitu atan MNF Member, Lawngtlai Chandmary bialtu MDC, Pu C.Lalsawmzuala an thlanga, Pu C. Lalsawmzuala hian LADC ah Sorkarna a siamtheih thu leh thlawptu a ngah tawk thu Larsap ah hian thlenin, Governor chhanna ngaihchan mek a ni.

Puan tawh angin LADC ah hian Bial 25 awm ah MNF in bial riat lain, Indian National Congress in Bial sarh, Zoram Peoples Movement in bial ruk an la a, BJP leh Independent ten bial hnih ve ve an la bawk.

Inthlan Result hriatfel a nih hnuah Inthlan laia thawk dun MNF leh Congress thawhdunna chu Congress in chhu chatin, ZPM leh Congress chuan thawhdun

tumin hma an la a, ZPM Thuneitu sanglamin thawh dun an remtih loh vangin, ZPM leh MNF chuan thawh dunna tur thui tak kal puin Sorkar ruangam tur pawh siamfelin, December 15 khan an hruaitu ZPM Member Pu T. Zakunga chuan Governor hnen ah Sorkar a siamtheih thu a thlen a, Larsap atanga chhanna ngaihchan a nih laiin tun thla Ni 6 khan MNF General Hqrs chuan ZPM nen an thawhdunna an chhu chat a, LADC ah Sorkarna siamtura indawrna a kal kual mek laiin, MNF leh Congress chuan United Legislature Party dinin, Sorkarna siam tumin hma an la leh mek a ni.



CENTRAL YMA

CBC- USA Women's Department hruaitu te chuan vawiin khan Central YMA office ah lengin ruihhlo dona tur cheng nuai 10 an hlan.

CBC USA Women's Department te hian YMA in ruihhlo dona atana an hman tur cheng nuai 10 Central YMA-a an hlan bakah hian Ruihhlo do kawnga hmalakna tur hrang hrang an sawiho a, Central YMA ah Kum 2023 atang khan thla tin Dollar 1000 an pe thin a ni.

